

NË EMËR TË POPULLIT

P. nr.753/2018

GJYKATA THEMELORE NË MITROVICË - Departamenti i Përgjithshëm, gjyqtari Rrahman Beqiri, me procesmbajtëse Selvije Kostërci, në lëndën penale ndaj të pandehurit D.A. nga ..., për shkak të veprës penale: Posedim i paautorizuar i narkotikëve, substancave psikotrope ose analoge nën 275 par. 1 të KPRK-së, duke vendosur sipas Aktakuzës së Prokurorisë Themelore në Mitrovicë – Departamenti i Përgjithshëm PP.II.nr.959/2018 të datës 20.09.2018, pas mbajtjes së shqyrtimit fillestar me dt. 06.02.2019 në prezencën e Prokurorit të Shtetit Stojanka Kasalovic dhe të pandehurit, me datë 08.02.2019 publikisht shpalli, ndërsa me datë 14.02.2019 përpiloi këtë:

A K T G J Y K I M

I akuzuari:

D.A., nga i ati ... dhe e ëma ..., e vajzërisë ..., i lindur me datë ...në ..., me vendbanim aktual në adresën: Rr. “...” nr...., i pa martuar, i pa punë, ka të kryer shkollën e mesme, i gjendjes së mesme ekonomike, me nr. personal ..., shqiptar, shtetas i Kosovës.

ËSHTË FAJTORË

SEPSE:

Me datë 14.11.2017, rreth orës 17:20, në parkun, në Rr. “...” në afërsi të ndërtesës së kuqe të ..., në ..., pa autorizim ka poseduar substancë narkotike, në atë mënyrë që me rastin e kontrollimit nga ana e policisë tek i njëjti janë gjetur katër (4) topëza – sfera të mbështjella me fletë të aluminit, substancë narkotike, në të cilën është vërtetuar prania e kanabisit (marihuanë) e cila përmban tetrahidrokanabinol (THC), me peshë 5.19 gram, e cila substancë edhe është konfiskuar.

Me këtë ka kryer veprën penale: Posedim i paautorizuar i narkotikëve, substancave psikotrope ose analoge nën 275 par. 1 të KPRK-së.

Andaj Gjykata në bazë të nenit 1, 4, 7, 17, 21, 41, 42, 43, 45, 46, 49, 50, 51, 52, 73, 75, 76 të KPRK-se, dhe nenit 450, 460 të KPP-së, e:

G J Y K O N

- I. DËNIM ME BURGIM në kohëzgjatje prej tre (3) muaj**, i cili dënim nuk do të ekzekutohet nëse i pandehuri nuk kryen vepër tjetër penale gjatë periudhës së verifikimit, në kohëzgjatje prej një (1) viti nga plotfuqishmëria e këtij Aktgjykimi.
- II. DËNIM ME GJOBË në shumë prej 250 € (dyqind e pesëdhjetë euro)** të cilën shumë obligohet ta paguaj brenda afatit prej tre (3) muajve, pas plotfuqishmërisë së aktgjykimit. Në rast se i pandehuri nuk e paguan gjobën, atëherë kjo shumë e dënimit me gjobë i shndërrohet menjëherë në dënim me burgim sipas ligjit.
- III.** Në mbështetje të nenit 275 par.3 e lidhur me nenin 69 të KPRK-së dhe nenin 282 par.2 nenpar.2.4 të KPP-se, të pandehurit i shqiptohet:

DËNIMI PLOTËSUES - konfiskimi i sendeve dhe atë:

Substanca narkotike e cila përmban tetrahidrokanabinol (THC), me peshë 5.19 gram

IV. OBLIGOHET i pandehuri, që t'i paguajë shpenzimet e procedurës penale sipas llogarisë përfundimtare të gjykatës, në emër të paushallit gjyqësorë të paguaj shumën prej 20€, ndërsa në emër të taksës për kompensimin e viktimave të krimit shumën prej 30€, të gjitha këto në afat prej 15 ditësh nga dita e plotfuqishmërisë së këtij aktgjykimi.

V. Kërkesë pasurore juridike nuk pati.

A r s y e t i m

Prokuroria Themelore ne Mitrovicë – Departamenti i Përgjithshëm ka ngritur Aktakuzën PP.II.nr.959/2018 të datës 20.09.2018, kundër të pandehurit D.A. nga Mitrovica, për shkak të veprës penale: Posedim i paautorizuar i narkotikëve, substancave psikotrope ose analoge neni 275 par. 1 të KPRK-së.

Gjykata ka caktuar dhe mbajtur seancën e shqyrtimit fillestar ashtu që në këtë seancë i pandehuri: e ka pranuar fajësinë në tërësi sipas aktakuzës, duke theksuar se e kuptoj natyrën dhe pasojat e pranimin të fajësisë, pranimi e fajësisë e beje në mënyrë vullnetare dhe pa presion.

Prokurori, lidhur me pranimin e fajësisë ka dhënë mendimin se i pandehuri e pranon fajësinë në mënyrë vullnetare, ky pranim është në përputhje edhe me provat që gjenden në shkresat e lëndës, propozoj gjykatës që të pranoj pranimin e fajësisë, e që gjate shqyrtimit të dënimit të merr parasysh të gjitha rrethanat dhe sjelljet e vet të pandehurit dhe faktin se i pandehuri edhe me herët është përgjigjur për vepër të njëjtë.

Gjykata, ka shqyrtuar pranimin e fajësisë të cilën e ka deklaruar i pandehuri, e në mbështetje të nenit 248 të KPP-ës, në këtë drejtim vlerëson se janë përmbushur kushtet ligjore për pranimin e fajësisë për të pandehurin. Gjykata, ka vërtetuar se pranimi i fajësisë nga ana e të pandehurit, mbështetet në provat me të cilat disponon kjo gjykate si: Deklarata e të pandehurit dhënë në polici e datës 14.11.2017; Vërtetimi mbi mjetet e konfiskuara të datës 14.11.2017; Konstatimin e ekspertit të forenzikës të datës 13.03.2018; Deklarata e dëshmitarit L.I. dhënë në polici e datës 14.11.2017; Fotodokumentacioni i datës 18.07.2018; Evidenca penale në emër të pandehurit; Të gjitha këto prova janë bindëse për gjykatën dhe formojnë elementin inkriminues e që në bazë e tyre dhe pranimin të fajësisë, konsiderojmë se për tej çdo dyshimi është vërtetuar se i pandehuri, ka kryer veprën penale që i vihen në barrë.

Gjykata, ka vërtetuar se pranimi i fajësisë nga ana e të pandehurit është bërë në mënyrë vullnetare, se i pandehuri ka kuptuar natyrën dhe pasojat e pranimin të fajësisë, duke i'u tërhequr vërejtja të pandehurit se pas pranimin të fajësisë, ai nuk mund të bëjë ankesë për shkak të konstatimit të gabuar të gjendjes faktike, gjykata ka vërtetuar se aktakuza nuk përmban asnjë shkelje të qartë ligjore ose gabim faktik, nga këto arsye gjykata e ka aprovuar pranimin e fajësisë të bërë nga i pandehuri D.A..

Gjykata, nga pranimi i fajësisë se të pandehurit dhe nga provat e cekura si më lart, ka vërtetuar përtej dyshimit të bazuar se i pandehuri ka kryer veprën penale: Posedim i paautorizuar i narkotikëve, substancave psikotrope ose analoge neni 275 par. 1 të KPRK, e për të cilën vepër penale është paraparë dënimi me gjobë dhe me burgim prej një (1) deri në tre (3) vjet.

Lidhur me llojin dhe lartësinë e dënimit gjykata ka pasur parasysh vlerësimin e rrethanave lehtësuese dhe renduese për matjen e dënimit ne mbështetje të nenit 73 të KPK-ës. Si rrethana renduese ka gjetur shkallen e përgjegjesisë penale gjë që nga provat rezulton se i pandehuri këtë vepër e kishte kryer me dashje, faktin se këto vepra penale janë rritje e sipër. Ndërsa, si rrethanë lehtësuese gjykata e ka vlerësuar pranimin e fajësisë në tërësi për veprën penale, faktin se i njëjti ka shprehe keqardhje dhe është penduar për ndodhjen e rastit, duke premtuar se në të ardhmen nuk do të përsërisë sjelljet e njëjta, sjellja korrekte e të pandehurit në gjykatë, ne raport me gjykatë dhe palët, faktin se është i moshës së re.

Duke marrë parasysh të gjitha këto rrethana si dhe shkallën e rrezikshmërisë shoqërore, gjykata vlerëson se, shqiptimi i dënimit me gjobë dhe me burg me kusht, ndaj të pandehurit është dënim i drejtë dhe i ligjshëm, në harmoni me shkallën e përgjegjesisë penale të të pandehurit, shkallën e rrezikshmërisë së veprës penale dhe me intensitetin e rrezikimit apo dëmit që i është shkaktuar vlerës së mbrojtur nga kryerja e kësaj vepre penale. Po ashtu , gjykata vlerëson se edhe me këtë dënim do të arrihet qëllimi i dënimit nga neni 41 par 1 të KPRK-së, që ti parandaloj kryerësit nga kryerja e veprave penale në të ardhmen dhe të bëjë rehabilitimin e tyre, si dhe të parandaloj personat tjerë nga kryerja e veprave penale si dhe forcimin e detyrimit për respektimin e ligjit.

Konfiskimi i substancës narkotike është bërë në mbështetje të nenit 275 par. 3 e lidhur me nenin 69 KPRK-së, sipas të cilit substanacat narkotike gjithnjë konfiskohen pa marr parasysh fajësinë apo pafajësinë e të pandehurit.

Vendimin për shpenzimet e procedurës gjykata e ka marrë në bazë të nenit 450 par. 2 pika 2.6 të KPP-së, që kanë të bëjnë me shpenzimet e paushallit gjyqësor. Ndërsa taksa për kompensimn viktimave të krimin, në kuptim të nenit 39 par. 3 të Ligjit nr. 05\L-036 për Kompensimin e Viktimave të Krimin.

Andaj gjykata duke u bazuar me neni 365, 450, 453 te KPPK-ës nga arsyeje e lartcekura ka vendosur si në dispozitiv të këtij aktgjykimi.

GJYKATA THEMELORE NË MITROVICË
Departamenti i Përgjithshëm
P.nr.753/18, dt.14.02.2019

Procesmbajtësja:
Selvije Kostërci

Gjyqtari

Rahman BEQIRI

Këshillë juridike: Kundër këtij aktgjykimi palët kanë të drejtë ankese në afat prej 15 ditëve nga dita e pranimit. Ankesa i drejtohet Gjyaktës së Apelit në Prishtinë, e nëpërmjet kësaj gjykate.

